

一夢騰々輕御風 忽然身已在天宮 笑他下界營生者 齷齪盆山枯水中

謝安

蒼生之望果如何 柳桓敗符功業多 轉取東山携妓手 幾年支得晋山河

東山一作醉中

哭赤澤天齋

手把花枝立墓墳 淚絲和雨灑殘曛 無多老友纔三四 今日何堪又哭君

記夢

一枕遊仙夢 飄然騎鶴行 下觀州六十 彷彿小蜻蛉

曉行

鷄啼人又起 數里帶星行 三四松間屋 石頭敲火聲

題清芳墨竹

松過信偏柳輕柔 清節虛心誰匹儔 移入前庭群卉裏 愛君瀟洒一株尤
葉々枝々未甚稠 移來近對小書樓 待君三伏煩敲日 貯得清風吹不休

題枯木生芽圖爲瀨川氏

暴富之名天下馳 驕夫馬卒亦能知 天降多福君家是 枯木生芽何足奇
豪富如君世所驚 豈將朱頓較聲名 千祥百福年年事 何怪瑞芽枯木生

詠史

自古功臣寵易衰 不惟烏喙有猜疑 多君勇決辭官去 一棹輕舟伴艷姬

一作官

贈門人女阿貞

脂粉群中人所推 挽回頹俗果爲誰 桑間濮上浮靡醜 敢詭女貞花一枝
不省標梅有嫁期 誓將教育報明時 笑他娘子軍功小 戎服纔扶夫婿師

贈古澤某

生計知君曾費虞 栽培群卉忘勞劬 近來洋檣價尤貴 不比成都八百株

戲示農工商

列名士籍便王臣 敢向三民屈此身 知否功勞祖先績 除他紛亂保三民
商賈農工莫我輕 會將武力致承平 縱令生計不如汝 官籍猶存士族名

觀碁戲示某

圍碁平日我能觀 下手知君欲勝難 對局之人真上手 神攻奇擊似無端

題畫 爲長嶺子

不妨許由棄 好伴子淵貧 也見愛瓢者 必非凡俗人
繫匏兼大瓠 排棄古來然 瓢也非無用 伴他顏子淵

自橫濱到金澤途中

老去徒行苦奈何 嶮危一路下車多 記會四十年前昔 不借一雙容易過

鎌倉客中

虎倒狼嗥幾變遷 黍離有感雨餘天 獨憐一箇銅鑄佛 安坐依然五百年

過佐久間象山舊宅并有引

余之歸臥盛岡殆三十年矣。聞象山先生仙去後。嗣子某年漸長。以有用之才。明治之初年拜某官職。頗有名望。而不數年又物故。先生侍妃阿蝶子。老而益健。與新寡婦人神原氏。家事經營勉強不怠焉。余心竊歎息。哀憐不措。頃日有事來于東京。訪田村小路儼居。居之狹隘。素雖不與往日同。灑掃之清潔。款待之禮節。皆不與先生在之日異也。余先謝多年疎濶罪。話及雲烟。過眼榮枯。不常之時勢。坐忘漏刻之移。且歷觀先生遺墨數幀。感慨之餘。賦小詩一首。詩之拙速。不足素示

人書以應二婦人強請耳。戊子八月下浣。

片紙殘縑世所珍 聲名長與墨痕新 知君先見杞憂切 猶是子平同一人

書安川氏所藏松菊木戶公所贈書簡之卷尾

至竟功臣不伐功 笑談時與下僚同 請看勿卒小書牘 却有交情存此中

刻苦經營擁紫宸 明治復古大功臣 可無遺墨長珍重 不啻重書兼重人

或作地
下猶存

望富嶽

四時戴雪白玲瓏 倒掛芙蓉扇面形 誰料入秋纔數日 天邊忽見士峰青

記夢

歌舞聲收夜寂然 鴛鴦被底訂良緣 夢中何識霎時夢 猶誓金環約臂年

書大王雜誌後

新說高論誰韻頌 煥乎不啻有文章 幾多雜誌皆奴隸 命做大王何失當

戊子三月將游東京

着得征衣氣壯哉 曉鐘聲裏待車來 臨行惟向家人誠 莫怠平生謹火災

有約車夫來不違 中津河上正朝暉 稚兒伴母立門外 問我安行幾日歸

紅葉館醉中戲書小詩送荒川兼子歸巖手縣

給事慣來舒且寬 一年強半接高官 寄言岩手諸遊客 莫作邨娃當日看 館中呼女兒稱

仕給

艷歌妙舞有誰爭 紅葉館中尤顯名 歸去應誇大臣宴 纏頭喝采荷恩榮

記夢

揚州騎鶴夢 今古嘲虛願 一覺怪腰輕 猶探金十萬

歸鄉道中

神聘魂飛難暫留 于風于雨趁新秋 今朝已渡白河水 始喜歸程入奧州

石井知事招飲分韻

詩酒團欒坐 不知殘月斜 遲吟請休怪 字々欲生花

醉未頽然眼未昏 任他大雪壓朱門 況蒙明府下交渥 一笑溫中寒也溫

刀岡招飲席上書似

滿郊黃稻實穰々 炊玉薪珠苦也忘 自喜秋成比例早 一馱價減二圓強

月邨畫林和靖圖

風采超然出世塵 愛梅愛鶴樂天真 先生胸宇素光霽 莫比彥倫一輩人

淡香纖月一庭奇 正是先生詩就時 仰倚梅邊何所待 冲天雙鶴下來遲

從其所愛識其人 先哲之言果是真 請看孤山林處士 梅清鶴潔點無塵

題桃源圖

一自携家來避秦 怡然有樂洞中春 仙桃花映禾黍綠 不許道真重涉津 重涉津一作長

身托

見危避亂出塵寰 深入桃源不復還 看做仙區我何信 神州亦有五家山

乾坤何有別乾坤 不信漁父入洞門 若得山中田二頃 怡然吾輩古桃源 第一二或作袁

區何別有乾坤不羨漁父入洞門

七賢六逸潔其身 不口桃源去避秦 一棄無憂經國事 山林逃跡豈忠臣

畫圖可怪洞中邨 誰假丹青寫寓言 請見漁父歸去後 一人無復入桃源

冬日喜晴

陰霖全歇恰黃昏 喜此西窓冬日溫 病臥床頭何所聽 水車聲急水潺湲

十三年六月一日那珂梧樓小祥忌辰。朋友門人會於大泉寺。祭其靈。席上賦之。

國步艱難幾禍機 踏來何省一身危 知君死後名愈大 不啻文壇樹赤旂
洗手何堪薦藻蘋 斜風細雨落花春 交遊幾歲論情誼 螢雪天涯同苦辛 碌々
瓦全遂何用 晶々玉碎也還珍 今朝忽值小祥忌 泣拜靈前愁淚新

驟雨 七月十五日席上

禱雨經旬還牢晴 農夫苦旱若何情 忽歡叩瓦敲檐外 十字溝流漲有聲

松間待月 課題

欲觀團月繫高枝 同仰庭松同賦詩 今夜幸然文士會 可無奇句敵奇姿

送谷本生遊東京

青年幸遇有爲時 富貴高名也可期 須忍飢寒研學力 不撓不屈是男兒

送山口剛介之九戶

毒霧瘴烟山又山 知君停杖立其間 祖筵一笑是何事 纔說別離便說還

讀關口青霞上州探勝錄

才筆縱橫無字刪 奚囊收得二毛山 徒游今覺當年夢 一瞥遇君詩句間

書太田鶴舟見山記後

見山縱目是君恩 記事可無遺子孫 花鳥之奇樓閣麗 彩毫寫得不嫌煩
豈惟金殿玉樓圖 歷々收來舊典模 堪笑扈從士多少 歸家徒詡探靈區
神騁夢迷三十年 自憐遊跡竟無緣 借君新著見山記 讀未全終只黯然

綱張溫泉圖付溫泉主人

靈泉靈絕妙 百病必全瘳 藥餌如無驗 速來浴一周

題鈴木新藏所藏三聖嘗酢圖

人生同古今 華夷何又分 儒教即天道 二典有明文

送大渡仙橋轉任內務省

自知再會合無緣 忍賦新詩賀轉遷 別恨今宵何說盡 交情辱厚十餘年
詩脫凡庸書絕倫 公餘乘醉寫天真 材官今日人非少 兼此風流有幾人
拮据辛勤誰不憐 轉任之命自天傳 可知蠖屈有伸滯 留此東阪十五年

澤田定國席上

何用望來欲問津 長橋一架壓波新 行人却向土人說 三陸由來少等倫
高架如虹結構新 何關嚙岸水聲噴 倚欄忽悼船橋日 一蹶幾回溺幾人
誰將建築役錢神 千尺長橋亘岸新 只禱依然無水害 明年能上納涼人

即事

冷忽成炎亦是天 四民自是始安眠 脫將昨日歉年慮 老夫檢田童浴泉

八幡社祭日

女尾老婆男老爺 街頭雜沓晚紛譁 吾曹別有祭餘樂 團月天邊雲不遮

聽山口剛辭官書以示

老走官途也可憐 從來二田爲無頃 羨君生計饒依舊 年少辭來讀太玄

秋日偶成

處々黃雲是墾田 秋郊回首一茫然 輸他家祿奉還士 除菅誅萌早着鞭

題雪嶺畫馬

細流堪飲草堪餐 脫兔驚鴻神自完 何用長嘶慕槽豆 郊原到處是天閑

豐太閤

慰主高言曾自誇 征兵漫向外邦加 怪君膽大畧繇小 不省蕭牆禍在家
織々濯々綠千絲 自向清池涵艷姿 無賴東風吹甚急 危堤搖動苦難支苦一作奈

士族聚話圖 席上

家々多是戰功家 六百年來各自誇 誰料堂々群士族 一朝聚首話桑麻
斷髮脫刀何足嗟 只嗟無策送生涯 歸農命下知非遠 須學耕田與紡麻

和歌題田家祝 應南部利國公之命

萬頃黃雲應肅祈 有年如此近來稀 邨人群賽狐王廟 打鼓將々夜未歸

藺相如

舌端曾挫虎狼秦 敢怯廉生私自嗔 逃避可知深意在 相如真箇趙忠臣

祝石井縣令增給

可識治平達玉墀 殊恩早已進班資 下車纔閱百餘日 不待三年殿最期

小保內定身訃音到賦以哭

離筵老去淚常垂 況是幽明道隔時 三十年來交款跡 追思忍賦哭君詩
豪俠如君吾所親 可無痛哭怨蒼旻 記會一醉對床夜 罵盡人間浮薄人一作當年輕薄

人

則天武后 石井北谷課題

戮辱忠良無所遺 唐家社稷殆傾危 最看殘忍絕倫處 故殺呱呱襁褓兒

歌曲讖成娥媚娘 果看武氏女君昌 李家遺孽漸將盡 獨愛蓮花似六郎

呈石井縣令

吏治民情察不遺 賦詩試馬豈徒爲 御繁以約平生志 比似當年顧凱之

司馬相課題

蓋世文章蓋世才 高車駟馬豈難哉 文君早有識人鑑 誰道琴絲巧樓來

才兼王佐才

起句一作詩賦

岸柳堤花映夕陽 湖天青樓水茫茫 風和不見大魚躍 幾點春帆似鳥翔

祝增子南筮七十初度

七十知君氣象豪 畫圖品格與年高 壽筵一醉寫何物 老鶴仰天鳴九皋

長生秘訣是傳燈 年僅古稀何用矜 老健依然畫三昧 期將手筆授雲仍

九月三日與尾高大矢太田諸君招飲于市邨竹蔭席上醉中賦以似諸君尾高藍香者上毛之一談客二十年前余相識也第三故及。

山吐銀蟾談突吻 快如今宵十年稀 況逢千里舊相識 一醉何知冷透衣

漫吟 大矢精助席上

巧敷鐵道擬長流 蒸氣車如蒸氣船 自是運輸兼急口 不須勞馬且勞車

新令百出百無成 空假文明開化名 苦矣世途危嶮甚 只看鐵道一條平

日進開明何所疑 先於鐵道見新奇 自今不說馬千里 千里東馳一霎時

物價高騰貧益貧 可知楮幣苦人民 恠他鐵路鍊平布 不造鍊錢千萬緡

送福士政吉游學東京時六月念八

賀汝擔簦志始伸 勉強須忍幾酸辛 學將游學當今士 勿作慕官于祿人

新田義貞

元弘功臣誰較功 一呼殪賊定關東 到今興廢勤王氣 生品祠前神樹風

神或作老

和歌題藝者戀

歌舞翻嫌趁宴新 除君恩顧更無人 女蘿何日托松柏 語盡當年幾苦辛

席上漫書

醫作教官僧法吏 駸々開化可驚哉 安知他日公卿位 不被樵漁占得來
呼頑喚固也曾甘 競利爭名非所堪 恠他頑固呼吾者 搖尾垂頭不敢慚

冬至招飲于蒲池良山

知道今朝是重陽 飛鳥走兔甚匆忙 書生課業驚年促 宮女針工愛日長 山歷
秋霜全露骨 梅迎春信暗含香 吾曹只重風流約 辛苦賦來佳節章 一作吾曹只
樂風流苦欲

賦驚人
詩一章

楠公

王師不利賊炎隆 鸞輅播遷危嶮中 誰料微々兵衛尉 奏斯復辟答天功
不啻使兵神且奇 誠忠古今似公誰 一杯土畔湊河水 流與芳名無竭時

題千窟谷城

神策奇謀賊膽驚 環攻百萬竟何成 休言蕞爾山嶺耳 幹地旋天是此城

月邨畫孤舟垂釣圖 爲中邨其寧

不比風流張志和 誤將生計寄烟波 誰言魚價甚騰貴 奈此竿租網稅何

讀大江楊鶴獄中詩用其韻書以贈

得罪重囚憂國深 蒼天何不照丹心 可憐三斗熱心血 吐向小詩歌且吟
潛々雙淚爲君垂 堪讀囚中日慰詩 寄語加餐須健在 表忠志達豈無時
誰道囚中日月遲 研經誦史任君爲 幸然天賜閒無事 卽是培才育德貲
句鍊字磨奇更奇 感君數卷獄中詩 可知今古真豪傑 心膽依然混不緇 一作心
片丹心

清少納言二首

不啻著書才可憐 捲簾美事最喧傳 侍筵儕輩徒嬌艷 不記白家詩一篇
兩部著書能竣功 宮娃才學共相同 若評紫氏與清氏 紫是艷桃清古桐

呈岡部松洲

吾是縣中迂闊士 莫將私謁避嫌疑 苞苴袖裏人如問 議世文章議世詩

探梅 東巖白雲樓席上

一樹仙姿絕俗埃 溪南故向雪中開 笑吾合浣花清潔 垢帽殘衣來訪梅
探得寒郊一樹梅 始知凡艷是興儂 紅輪紅顆花如玉 獨在皚々雪裏開

大釋溫泉八景

大釋橋激端

清湍激石々皆奇 大釋橋頭立半時 未到浴場先快意 可知百病不難治

巖手山暮雪

依然巖手小芙蓉 不似群山無定容 請看暮雪遮不盡 天邊雪白最高峰

龜瀑紅葉

一浴身輕好緩行 重陽節後恰秋晴 喜觀龜瀑如垂練 快與紅於同琇瑩

烏帽嶽瀑布

嶽稱烏帽突然高 數朶諸山是辨髦 痛快雨收雲散後 一雙大瀑掛奔濤

滴石晚烟

滴石邨跨滴石川 人家南北斷還連 模糊烟淡蕭々暮 薪筏降流是那邊

葛根田巖窟

鬼削神剗巧構成 巖爲高屋石爲楹 我來驚愕支杖立 所見勝聞奇窟名

綱張墳泉

纔隔浴場三里程 噴泉處々似相爭 上騰百丈吐烟霧 白日冥々鳴有聲

高倉山殘月

寓樓垂曉雨初晴 喧聒浴堂言笑聲 誰賞高倉山半腹 倒懸殘月一鉤明

元日訪梅

嫌他羣客賀正譁 吟伴相携曉出家 路轉東郊人莫恠 年々依例訪梅花

韓信

囊沙背水策尤奇 勝算如神人所推 獨恠保身計還暗 一朝遂被女兒欺

嘲侮經來幾苦辛 封侯此日漢功臣 請君莫愧胯間辱 坐有圯橋捧履人

徒害身男兒宜忍辱與曠請看壇上新任將曾是胯間蒲伏人

內藤天爵墓在盛岡。今茲當五十年正忌。嗣子十灣自鹿角來。修洗碑

石肥腴潔絮。舉行祭典。招致賓客諸友。余亦與焉。聊賦小詩二首以供

過眼雲烟真可驚 不知時世屬文明 想君地下眠應穩 五十年前是太平

五十年間夢一過 追思先考有餘悲 誰知白髮祭祠者 曾是膝前嬉笑兒

送客

歸計十年猶未成 祖筵今夕暗傷情 羨君明日赴任路 向我家山近處行

57

清人王治本來訪見似繫澤道中詩二首次其韻

茅屋三間斷俗埃 不言避債苦無臺 吠老常逐凡僧去 喜雀能迎珍客來 紙欲

乞書舒又卷 窓因觀雪閉還開 謝吾未解中華語 語々煩君頻動顛

一白何邊着點埃 漁簷樵戶也瑤臺 撲車飛雪沙々散 突吻奇談滾々來 勝地

多經險路達 心茅儘遇快人開 想君繫澤道中苦 寒逼征裘冰滿顛 結句用全句

竹樓賞雪

坐愛奇觀望裏添 何須呼絮且呼鹽 疎々樓外含風竹 拂々不容飛雪黏

雪中春酌

笑向都人有可誇 醉來手捲碧窓紗 陸中二月猶飛雪 樹々無枝不着花

夏初卽事

九十春光一指揮 茫然回首倚樓欄 問君新綠如斯好 孰與花前醉盡歡

書感

在家身似在羈桎 家政之權委老妻 是菜是魚渾不管 安知百物價高低

題杜陵詩稿

說史講經吟且哦 健康六十九年過 不言聖世吾無用 教育諸生功也多

中秋無月

癡雲妬月意如何 天欲晴時雨轉多 更已過三酒全醒 未看團影落清波

引柘鯨飲仰天歌 今夜風流才子多 寄語嫦娥如有意 雲間莫惜舞婆娑

欲爲同胞救凍飢 此心豈敢抗王師 建言不達九重上 激作叛臣真可悲

丁亥十月訪士剛新居

步趁秋晴不用車 來尋郊外僦居家 滿庭李實非君有 且約明春賞李花

十九年三月十七日招飲于可仙席上書以壽時百花欲然百鳥欲發

音。坐中皆醉

才子風流名兩全 祝君志氣健依然 衰殘愧我來陪飲 四十二年初度筵

日清戰雜感

誰言平壤嶮無雙 一半奔逃一半降 最是城中驚慌處 天兵飛渡大同江

砲戰相交氣益振 擊城衝壘碎成塵 請看右武男兒國 前進曾無後退人

57

屠得平壤又進兵 將軍心膽與秋清 沿途堡壘輕於葉 好向燕京試遠征
 神州五十萬精兵 一舉今將壓滿清 豐公當日略何小 纔把征韓誇遠征
 誰省檣摧楫碎艱 將軍不動屹如山 須叟激戰天昏黑 敵艦奔逃渤海灣
 波上猶餘過艦痕 監軍有命不追奔 茫茫黃海天懸月 照見紅旗陸續翻

鯢山遺稿乙集終

補遺

題畫

老樹聳參天 天邊紅葉舞 蕭々一夜風 吹作數家雨

代奠以供奈良孝齋靈前

實學欽君育實才 將他官祿比塵埃 果看親炙人多少 不着浮華一點來

壬辰一月七十自壽

齡過百年吾所幾 誰言七十古來稀 兒孫遶膝尋常事 欲見曾玄着綵衣

梅

嫌與凡花伍 先春放猛香 請見鋏枝幹 風雪不能傷

偶成

我寒可忍奈兒寒 老去始知爲父難 追思疎豪飄泊昔 單衣十月一身安

洲寄晴嵐 金澤紀勝次巖谷一六詩韻

朝去巖痕出 山連秋影涵 漁翁收釣去 晴渚少浮嵐

瀬戸秋月

秋天収夕烟 遠翠細如髮 忽看金蛇趨 長波振大月

小泉夜雨

風景似瀟湘 雲低接遠浦 夜深人未眠 蓬底臥聽雨

乙艦歸帆

杳渺似無際 遠山斜日銜 海雲連浪處 望久認歸帆

稱名晚鐘

地偏幽絕境 誰共問前蹤 春寺人多少 風華翻暮鐘

平瀨落雁

海國秋方至 春光夢耶幻 蘆花叵夕陽 洲渚落孤雁

野島夕照

當年名畫師 投筆入玄妙 我欲弔遺跡 松林澹殘照

內川暮雪

溪山合復琢 四境自清絕 長駐暮天雲 平川帶晴雪

觀蓮

盾日尙熇々 一身投鼎鑊 待得簡書來 去赴觀蓮約 小々一輕舸 業已具枵
 杓 短棹任所之 不復勞赤脚 亭々與淨々 過邊玉交錯 香風吹滿池 池水
 亦可酌 咫尺別天地 怎辨魯酒薄 一杯又一杯 團樂互酬酢 不知日光傾
 返照臨池閣 閣上諸女伴 觀花卷繡箔 嬌粧與花和 波間影鮮灼 停楮灑雙
 眸 醉中漫揚推 中有感慨士 憤然禁該謔 太平三百年 士氣漸纖弱 帶將
 日本刀 直欲泛太舶 蠻奴何如者 頻年事侵略 自古君子國 不許長鯨躍
 當今何偷安 江門無鎖鑰 癡漢多當路 奇士却落拓 熱血滿腔子 言々堪嗟
 若 我聽塞其口 一言枉檳却 布衣非所言 廟堂有矩護 只合飲此酒 一醉
 澆壘砢

秋郊所見

處々黃雲是懇田 秋郊回首一茫然 輸他家祿奉還士 除管誅茅着祖鞭

八月十五日八幡宮祭夜同柝內諸氏賦

神鼓無聲雲亦開 無街無巷不喧喧 閑人別愛今宵月 輾自八幡山上來

57

連朝雨是滯君行 却喜梅天太有情 靜掬雲烟倚樹待 徐追鷄犬出門迎 杜陵
酒惹羈愁緩 風月詩教官味輕 吾也廿年淪落客 歎嗟自在話中生

遠山雪和歌題

驚峰戴雪勢巍々 自有靈□山有威 千古恩光誰不仰 晶々長與日華輝 勢巍々 一作跨々

折效

明治廿三年九月廿八日。舊曆八月十五日。仙臺藩參政三好監物君。節死之
忌日。有志諸子相議。設其靈位於一關嚶鳴閣。進薦吊祭。併陳列其遺墨於閣
中。又開書畫筵。來會者殆一百數十名矣。嗚呼盛哉。余亦幸然得廁其盛筵。聊
賦追悼詩一章。謹書再拜以奉故三好君靈前。

斷然決死豈偷生 捕吏敲門也不驚 何事會元難易贊 請看季路結冠纓 懇諭
冢子謝王母 徐着朝衣拜帝京 遺恨藩論謬順逆 乃公自碎□長城

雪

已識黃花無處尋 寒雲釀雪晝猶陰 一枝好在須珍重 爲是吾曹鍾愛深

觸竹灑松看綴珠 一庭新雪白平敷 問君春雨秋風日 如此奇觀也有無

題湊川圖

鬱々青松表墓門 楠公遺跡到今存 數行空□英雄淚 一劍曾寒姦賊魂 三世
忠誠爭日月 千年碧血照乾坤 可憐伏臘歲時祭 猶有邨翁薦藻蘋

冬日閑居分韻

風塵楓葉半庭赤 一株最見庭松碧 冬日可愛未甚寒 晴窓淨几閑自適 鶴書
昨日辱君恩 布衣新得列士籍 有俸吾已不泣飢 儻居何妨非吾宅 縱假俸無
補國家 講經亦免素餐責 憶昔暇日忙更忙 南船北馬遍蹤迹 峭帆朝破萬疊
波 破靴晚卸三戶驛 勞々十有八年間 幾度不堪饑寒迫 吟漏感慨吟慰愁
百篇詩成何論格 携贈故人爲歸遺 故人誤賞爲詩伯 慚愧故人未棄吾 爲我
設筵讓吾席 嗚呼疇昔辛苦今歡娛 安閒只得耽簡冊

十三夜

前月何如後月良 愛看滿地滿天霜 遮窓木葉飄零盡 全體無瑕照入堂

送小田愛匡之北海道師校

壯君此去試豪遊 誰以飛鵬擬泛鷗 萬里長程三日達 多年宿志一朝酬 欲編
山海經餘史 更踏蜻蜓尾外州 蝮屈嗟吾伸不得 空過七十二春秋

今茲明治乙未余在花卷。不堪殘暑。來浴大澤溫泉。其地幽邃而有雅
致。山水雙絕。身心乍爽快。坐觀山之變幻。臥聽水之潺湲。恍然自疑。此
身入仙寰。欲去不能去。留五六日。溫泉主人。持舊藩君所賜大澤八景
畫歌帖來示。且請余亦題之。余披而閱之。則藩君玉詠及月嶺畫。侍臣
某々和歌。皆極其趣矣。今余已衰老。不能苦思。謝辭再三。主人猶請而
不已。乃匆卒賦小詩八首。素不加推敲。書以塞其責耳。若余此詩。亦或
與藩君所賜之帖。保存於永遠。則豈可不多幸乎哉。明治廿八年八月
十有八日。舊藩學助教七十四叟鯢山

羊腸一路杏難攀 落木蕭條矢矧山 憐見樵夫生計苦 相携陸續擔薪還
屈曲榮回豐澤川 絲々雨灑送梅天 擡頭愛聽茅簷外 角々蛙聲到枕邊
豐水回々到大回 巖間激盪響如雷 忽成飛瀑落天半 一賞使人呼快哉
節近迂蘭盆會天 家々聚首說豐年 一痕猶是松倉月 照出黃雲萬頃田

四面峰巒秋欲老 紅楓如火映斜陽 一丘別有後凋在 檜葉青々能耐霜
一架長橋曲似虹 混堂隔在水西東 浴餘連屐納涼客 偃立欄干領晚風
源々涌出不停聲 水恰如水夏更清 浴客成羣齊苦渴 汲來汲去互相爭
凍雲黯淡日全傾 遙聽歸樵笑語聲 一白高倉山上雪 模糊應照細溪明

明治三年春。於竹塘太田君之詩會。席上醉中書以記喜
國事多難幾變遷 風流落地已三年 當今運屬文明世 結社重開詩酒筵
明治廿三年。太田君新年小集。陪於筵諸老先生。醉中賦小詩以供一
啖粲。

棋伴吟儔又酒徒 官員俗士一人無 華筵今日真耽樂 四顧無人不老夫
乙酉元旦
災厄人間不可無 區々何用費憂虞 焦頭爛額他時夢 醉此新年酒一壺

鯢山遺稿補遺終

太田孝太郎校訂

574

昭和四年五月十五日印刷
昭和四年五月二十日發行


南部叢書第八冊

不許複製 (非賣品)

編纂
行人兼

南部叢書刊行會

代表者 太田孝太郎



印刷所

單式印刷株式會社

東京市芝區金杉新濱町十二番地

代表者 和田助一

盛岡市中ノ橋通・盛岡銀行俱樂部内

發行所

南部叢書刊行會

特許・單式印刷

57
A

~~574~~

1/682 箱
の

~~574~~ 08/17 574
~~17~~ 1/48 7
(8)

